



**TERTIB ACARA KEBAKTIAN MINGGU
GKPS P.BULAN-RESORT POLONIA MEDAN
Minggu INVOKAVIT, 21 Februari 2021**



TOPIK: "PADAN AMPA KUASA NI NAIBATA"

Live streaming: www.gkpspadangbulan.com/tv

Tata Ibadah: <http://www.gkpspadangbulan.com/tatib>

1. Votum – Introitus – Tonggo

P : **Riap ma hita jongjong!**

Ibagas Goran ni Naibata Bapa pakon Tuhan Jesus Kristus ampa Tonduy Napansing, Sitompa langit pakon tanoh on. Amen.

"Diloonni do Ahu, jadi balosanku ma ia; hasomanan-Ku do ia sanggah tarsosak, paluahon-Ku do ia anjaha marmulia bahenon-Ku" (Psalmen 91:15). Haleluya, Haleluya, Haleluya.

K : **(Mandodingkon "Haleluya, haleluya, Haleluya")**

P : **Martonggo ma hita!**

Ham Tuhan Jesus Sipaluah janah Sihopkop hanami. Domma manaron Ham halani hahurangan pakon hagalekonami jolma pardousa on. Paahapkon Ham ma hubagas uhurnami ganupan, na harga do hanami ilobei-Mu janah sirsir do Ham tongtong manangihon janah mambalosi tonggonami. Rajai Ham ma uhur pakon pingkirannami ase sintong parsombahannami hu Bamu. Balosi Ham ma tonggonami on Tuhan. Amen! *(Hundul Kuria)*

2. Mandoding 408. Haleluya Puji ma Tuhan (1-2)

1. Haleluya puji ma Tuhan, pasangap marhiteihon gondrang na laingan Irandu pakon inggou na lurlur homa tangaron Dodingkon ma doding na baru, Puji ma la bai hotakNi na ibabou Janah olobkon ma riap marmalas uhur. Sai tarbarita baen goran-Ni, Gok halongangan ganup jadi-jadian-Ni Puji Tuhan Haleluya!

2. Marmegah gok tarima kasih, Halani ganup pasu-pasu 'ge layak-Ni Hubanta na totap sirsir tong mambalosi. Tunggung tumang do tong Tuhanta, la do Raja ni ganup sagala raja Ningon hu Bani do unduk ganup marsambah

Sai tarbarita baen goran-Ni , gok halongangan ganup jadi-jadian-Ni Puji Tuhan Haleluya

3. Hasasapan ni Dousa

P : **Riap ma hita jongjong!**

Martonggo ma hita, sopotkon hita ma dousanta hubani Tuhan Naibata.

"Ham Tuhan Naibata Bapanami, Pardear layak anjaha Parholong ni uhur hubani haganupan jolma. Ipagolpa Ham do hanami ase totap marhasadaon, manggoluh ibagas damei ampa marsihaholongan. Hape gati do hanami lang marhasadaon, ibagas patinggilan pakon mamingkirhon diri nami sandiri tumang. Parsahap pakon pambahenan nami pe gati do parohkon na hurang dear bani hasoman. Sonai homa tanggungjawab i tongah-tongahni keluarga ampa rumah tangga nami bei gati do lang idalankon hanami. Nuan, roh hanami hulobei-Mu mansopotkon dousa nami in. Maidop ma uhur-Mu, sasap Ham ma dousa nami in, janah tompa Ham ma uhur na baru bannami, ase ulang inunut hanami mardousa. Ipindo hanami on hu Bamu, ibagas Goran ni Anak-Mu Jesus Kristus Tuhan nami. **Amen.**

Tangar anjaha haporsayai hita ma Hata ni Naibata, bagah-bagah pasal hasasapan ni dousa.

"Anggo isopotkon hita dousanta, hatengeran ni uhur anjaha bonar do la manasap dousanta, ampa paborsih hita humbani haganup hagedukon" (1 Joh.1:9).

Ibagas holong ni Naibata, domma isasap haganup dousanta. Halani ai pataridahkon hita ma tanda-tanda ni pargoluhan na bayu. Hasangapon ma bani Naibata ibabou.

K : **Amen.**

(Hundul kuria)

4. Mandoding 458. Bai Ganupan Sidalanmu In (1-2)

1. Bai ganupan sidalanamu in Jesus ma baen hasomanmu Iparorot do ham tongtong ijin ronsi ondos bai tujuan mu Ge daoh mahol sidalanamin ulang ham mandolei ijin Seng boi sotto ham bahenonni in Asal Jesus baen hasomanmin

2. Sanggah loja ham mamingkiri in bani Jesus patugah in Na ngayotan ham bani dalamin ai ibotoh do ganupan in

Ge daoh mahol sidalanamin ulang ham mandolei ijin
Seng boi sotto ham bahenonni in
Asal Jesus baen hasomanmin

5. **Hata haporsayaan**

P. Riap ma hita jongjong!

Saksihon hita ma haporsayaonta in, songon na sinaksihon ni haganup halak na porsaya bani sab tanoh on!

P+K. Ahu porsaya bani Naibata Bapa, Pargogoh na so tarimbang, na manompa langit pakon tanoh on. Ahu porsaya bani Jesus Kristus, Anak ni Naibata na sasada in, in do Tuhanta, na tinubuhkon ni si Maria sanggah nape haliaban, marhitei Tonduy Na Pansing. Na manaron na parngit, bani panorang ni si Pontius latas, iparsilangkon, matei anjaha itanom, turun hu nagori toruh. Mulak manggoluh hambani na matei bani ari patoluhon. Naik hu surga anjaha hundul i siamun ni Naibata Bapa, Pargogoh na so tarimbang in. Hunjai ma la mulak magira laho manguhumi halak na manggoluh pakon na dob matei.

Ahu porsaya bani Tonduy Na Pansing, bani kuria parsadaan ni namapansing in, bani hasasapan ni dousa, bani parpuhooon ni angkula, pakon bani hagoluhan na sadokah ni dokahni. Amen

6. **Persembahan Pujian**

7. **Tingting + Tonggo Pangapition**

8. **Mandoding 412. Marodor na Porsaya (1-2)**

1. Marodor na porsaya ganupan,
na laho misir huparmingguan, damei tongtong,
Tunggung jagiah doi idahon,
minar bohini ganupan, damei do tongtong.

3. Porini pe adong lobih hurang,
pongkut do manangihon ambilan, damei do tongtong.
Tanda do ganup na dob monang,
tinobus ni Jesus parholong, damei do tongtong

9. **Ambilan: 1 Musa 9:8-17**

10. **Manggalang:**

Paima iondoskon hita galanganta, tangar hita ma lobei hata ni Naibata na gabe onjolan banta laho manggalang , aima na tarsurat bani:

Psalmen 50:14: "Galangkon ma bangga ni uhur bani Naibata, anjaha galari ma bagah-bagahmu bani Sitimbunan in". **Sonari ondoskon hita ma galanganta!**

11. **Tonggo Galangan – Panutup :**

P : Riap ma hita jongjong!

Martonggo ma hita mangondoskon galanganta hubani Naibata!

Ham Tuhan Naibata Bapanami harohan ni haganup. Hun Bamu do harohan ni pasu-pasu hubannami. Ibere Ham do bannami goluh ampa hagoluhan ari-ari. Ijon iondoskon hanami do hu Bamu goluh pakon pasu-pasu na dob binere-Mu in bannami. Sai lambin margogoh ma tongon hanami ihasomani idop ni uhurMu ampa pasu-pasu-Mu bani na mandalankon horjanami. Papansing Ham ma galangan na ginalangkonnami on gabe galangan na misbou ilobei-lobei-Mu, ase lambin ihargahon hanami tongon dear ni layak pakon pasu-pasu-Mu in marhitei na pasaudkon harosuh-Mu hambani gogoh, pingkiran, ampa sinadongannami. Tarimakasih ma Bamu Tuhan. Marhitei Jesus Kristus Tuhannami, jalo Ham ma galangan pakon tonggonami on. Amen!

K : (Mandodingkon Halleluya No.5:4).

Bamu sadokah ni dokahni, au on o Jesus Tuhankin

Ham ma "lah haganup ompungni, gogohku pakon artangkin.

Ai iberehon Ham daroh-Mu, manggalar utang ni dousangku.

12. **Tonggo Panutup/Tonggo Ham Bapanami**

P : Ham Bapanami na i nagori atas. Sai na papansing ma goran-Mu. Sai roh ma harajaon-Mu. Sai saud ma harosuh ni uhur-Mu i nagori tongah on songon na i nagori atas. Bere Ham ma bannami sadari on hagoluhan ari-ari. Sasap Ham ma dousanami songon panasap nami bani dousa ni hasoman na mardosa dompak hanami. Ulang hanami bobai Ham huparlajouan. Paluah Ham ma hanami hambani pangagou.

K : Ai Ham do simada Harajaon pakon Hagogohon ampa Hasangapon sadokah ni dokahni. Amen!

13. **Paingkatkon/Pengutusan**

P : *Misir ma nasiam, baritahon janah saksihon nasiam ma Ambilan Namadear in ija pe nasiam marianan.*

14. Pasu-Pasu

P : **Jalo ham (hita) ma pasu-pasu humbani Tuhan Naibatanta:**

“Ipasu-pasu anjaha iparorot Tuhan Naibata ma ham (hita). Isondangkon Tuhan Naibata ma bohi-Ni hu bamu (hu banta), janah maidop ma uhur-Ni mangidah ham (hita). Idompakkon Tuhan Naibata ma bohi-Ni hu bamu (hu banta) janah ipasorap ma damei-Ni bani tonduymu (tonduyta bei), Amen!”

K : **(Mandodingkon:Amen, Amen, Amen!!)**